

Allanguutissatut siunnersuut

uunga

**Uunga siunnersuut: Inissianik aningaasalersuisarneq pillugu Inatsisartut inatsisaata allangortinneqarnera pillugu Inatsisartut inatsisaat nr. xx, xx. xxx 2019-imeersoq.**

Sanaartornermut Ataatsimiititaliamit pingajussaaneerinninnissamut saqqummiunneqartoq.

§ 1-imut

**1. § 1, nr. 2-mi § 24 a, imm. 1 ima oqaasertalerneqassaaq:**

” Inissianut, inunnit ukiuni akileraarfiusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartunut, imaluunniit inunnit, ulloq manna tikillugu isertitarisimasaat apeqqutaatinnagit siunissami qanittumi inoqutigiinni ukiumut 300.000 koruunit inorlugit isertitaqartussatut naatsorsuutigineqartunit pigineqartunut annerpaamik 150.000 koruuninik inissiamik iluarsaassinermut, pitsanngorsaanermut imaluunniit alliliinermut kommunalbestyrelsi tapiissuteqarsinnaavoq.”

**Nalinginnaasumik nassuiaatit**

Allanguutissatut siunnersuutip kingunerissavaa inissiamik iluarsaassinermut, pitsanngorsaanermut imaluunniit alliliinermut tapiissuteqarfigineqarnissamut isertitanut killigitassatut siunnersuutigisap qaffanneqarnera.

Tamatuma kingorna inissiat inunnit ukiuni akileraarfiusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartut imaluunniit inunnit, ulloq manna tikillugu isertitarisimasaat apeqqutaatinnagit siunissami qanittumi inoqutigiinni ukiumut 300.000 koruunit inorlugit isertitaqartussatut naatsorsuutigineqartunit pigineqartut iluarsaannissaannut, pitsanngorsarnissaannut imaluunniit allilernissaannut tapiissuteqartoqarsinnaalissaaq.

Naalackersuisut inatsisissatut siunnersuutaanni isertitassanut killigititaq 180.000 kr.-inut aalajangunneqarsimavoq.

Isertitanut killigitat qaffanneqarnissaannik siunnersuummut tuliaqutaasoq pillugu Sanaartornermut Ataatsimiititaliap pingajussaaneerinninnermut ilassutitut isumaliutissiissutaa innersuussutigineqarpoq.

**Siunnersuutip aningaasatigut kingunerisassai**

Allannguutissatut siunnersuut nunatta karsianut kinguneqassanngilaq.

Iluarsaanermut tapiissutitut akisussaaffik 2020-mit kommunit nuunneqassaaq. Ataatsimoortumik tapiissutit ukiumut 10 mio. kr.-inik amerlinerisigut kommunit tamatumunnga taarsiiffigineqassapput, taakku naligaat aningaasanut inatsimmi ukioq manna 87.72.23-mut immikkoortinneqartut. Qinnuteqartoq pinngitsoorani tapiissuteqarfigineqarnissamut Inatsisartut inatsisaatigut pisinnaatitaaffilerneqanngilaq. Taamaattumillu kommuni aningaasaqarnikkut killigittat qanoq ittut iluanni iluarsaanermut il.il. tapiissuteqassanersoq kommunit ataasiakkaat namminneq aalajangissavaat. Tamatuma kingorna kommunit tamakkiisumik tapiissutaat 10 mio. kr.-init amerlanerusinnaapput, aammali taakkuninnga ikinnerujussuusinnaallutik.

Tapiissuteqarnissamut isertitatigut killigittassatut siunnersuutigineqartut allannguutissatut siunnersuutikkut qaffanneqarnerat qinnuteqartut amerleriarnannik kinguneqassasoq naatsorsuutigineqarsinnaagaluartoq imaanngilaq allannguutissatut siunnersuutip kingunerissagaa kommunit aningaasartuutaasa amerleriarnerat.

**Allannguutissatut siunnersuummi aalajangersakkanut ataasiakkaanut nassuiaatit***§ 1-imut*

Nr. 1-imut

Inissanik iluarsaanermut, pitsannorsaananermut imaluunniit allilerinermut tapiissutisinissamut isertitatigut killigittassatut siunnersuutigineqartup qaffanneqarnera allannguutissatut siunnersuutip kingunerissavaa.

Tamatuma kingorna inissiat inunnit ukiuni akileraarfiusuni kingullerni marlunni inunnit ukiumut 300.000 koruunit inorlugit isertitaqarsimasunit pigineqartut imaluunniit inunnit, ulloq manna tikillugu isertitarisimasaat apeqqutaatinnagit siunissami qanittumi inoqutigiinni ukiumut 300.000 koruunit inorlugit isertitaqartussatut naatsorsuutigineqartunit pigineqartut iluusaannissaannut, pitsannorsarnissaannut imaluunniit allilernissaannut tapiissuteqartoqarsinnaalissaaq.